

駢

體

文

鈔

駢體文鈔卷二十五

誌狀類

王史威長葬銘

此爲埋石造端蓋自爲之取辨名姓爾後之猶得明旌旗
識之遺

漢西都時南宮腹殿內有醇儒王史威長死葬銘曰

明明哲士知存知亡崇隴原壘非寧非康不封不樹作靈
乘光厥銘何依王史威長

杜子夏臨終作文命刻石埋於墓前

魏郡杜鄴立志忠欵犬馬未陳奄先草露骨肉歸於后土
魂氣無所不之何必故邱然後卽化封於長安北郭此焉
宴息

宋臨澧侯劉使君墓誌

從續古文苑本

誌墓盛於晉代乃所傳惟傳休奕一篇又非全文當以

此爲權輿矣其序次之式亦頗可垂範

曾祖宋孝皇帝祖道鄰字道鄰侍中太傅長沙景王如高
平平陽檀氏字憲子謚曰景定如父暢道淵永寧令祖貌
稚罷邲邲太守合葬邲邲臨沂莫府山父諱義融字義融
領軍車騎桂陽恭侯夫人邲邲臨沂王氏字韶鳳父簡長
仁東陽太守祖穆伯遠臨海太守合葬丹徒練壁雩山所
生母湯氏宣城人葬練壁雩山兄顓茂道散騎常侍桂陽
孝侯夫人廬江瀟何氏憲英父愉之彥和通直常侍祖叔
度金紫光祿大夫合葬練壁雩山第三弟彪茂蔚祕書郎
葬江乘白山夫人河南陽翟褚氏成班父方回太傅功曹
祖叔度雍州刺史第四弟寔茂軌太子舍人夫人邲邲臨
沂王氏淑婉父津景源中書郎祖虞休仲左衛將軍合葬
江乘白山第五弟季茂通海陵太守葬練壁雩山夫人陳

郡夏袁氏妙口父淑陽源太尉忠憲公祖豹士蔚丹陽尹
第一姊茂徽嬭陳郡長平殷臧憲郎父元素南康太守祖
曠思泰口軍功曹重嬭瑯瑯臨沂王閔之希損鎮西主簿
父昇之休道都官尙書祖敬宏左光祿儀同第二姊茂華
嬭廬江蕩何求子有祕書郎父鎮長宏宜都太守祖尙之
彥德司空簡穆公第三姊茂姬嬭平昌安邱孟詡元亮中
軍參軍離父靈休太尉長史祖景彥遠丹陽尹第四姊茂
姜嬭蘭陵蕭惠徽中書郎父思話征西將軍儀同三司祖
源之君流前將軍第五姊茂容嬭蘭陵蕭瞻叔文父斌伯
禱青冀二州刺史祖摹之仲緒丹陽尹重嬭濟陽園蔡康
之景仁通直郎父熙元明散騎郎祖廓子度太常卿第六
妹茂姬嬭濟陽考城江遜孝言父湛徽淵左光祿儀同忠
簡公祖夷茂遠前將軍湘州刺史重嬭瑯瑯臨沂王法興

驃騎參軍父翼之季弼廣州刺史祖楨之公幹侍中夫人
濟陽考城江氏景姑父滾徽源太子洗馬祖夷茂遠前將
軍湘州刺史第一男晃長暉出後兄紹封桂陽侯第二男
旻淵高拜臨澧侯世子第三男曷淵華第四男量淵遠出
後第四弟寔第五男口淵頰第六男旻淵平第一女麗昭
第二女麗明第三女小字僧歸亡葬口口

宋故散騎常侍護軍將軍臨澧侯劉使君墓誌

君諱襲字茂德南彭城人宋高祖武皇帝弟景王之穆也
神姿韶雅風譽夙懋弱冠拜祕書郎逮二凶肆禍人倫道
消君身離幽執僅免虎口事清還復舊職以母憂去官旣
除又拜祕書郎轉太子舍人自升口二宮令望允緝出爲
鎮蠻護軍廬江太守莅政平簡聲績兼著遷明威將軍安
成太守屬中流構疊四表迷逆君英義獨發招會如神故

能以一口之旅尅濟忠節義超終古誠冠當今皇朝欽嘉
爵賞取榮除輔國將軍郢州刺史封建陵縣開國侯俄徵
太子右衛率加給事中未拜遷侍中冠軍將軍改封臨澧
縣開國侯鎮肅石頭寔當關要之寄遷左衛將軍未拜仍
除中護軍春秋卅有八泰始六年三月十日薨於位聖主
嗟悼朝野傷悲有詔故中護軍臨澧縣開國侯志行貞純
才用理濟忠勲著於艱時勲績倡乎泰運年志始壯奄焉
凶折悲傷惻割寔兼常懷思加寵數以申哀榮可贈護軍
將軍加散騎常侍餘如故謚曰忠侯粵五月廿七日庚寅
將葬於瑯琊之乘武崗以悲幽明之殊隔傷一訣而永分
仰清徽而攬淚係元石而裁文其辭曰

峩峩□□山岳效靈允矣君子誕膺休禎支蔭帝宇締慶
文明德以行高仁與□□□華二官官政兩服國步時屯

艱難斯屬忠則忘家義寔光族朝廼欽庸以□□□□望
既歸□寵惟□或侍帝言或司蕃戎方宏牙美□□家邦
如何不□□□□躬□芳稍述日月有時考辰筮吉元堂
啟基深泉永窆□□長悲□□□□□□□□

宋張氏墓誌

宋故臨渭縣侯湘東太守張府君諱濟夫人邱氏諱靜姬
第三女推兒春秋卅有一亡於徧憂元徽元年十月甲辰
十七日庚申權假窆於西鄉

遠葉蘭飛浚源泉潔履順早晨含章妙歲選史圖容循詩
範節皎鏡冬泉優柔春惠溜北忸行營東慙藝冥昧慶善
冒翳壽仁泣血實性團憂殲身罷景方旦摧華載春壠木
已謫墓草行陳朱火幾爛元夜無晨

江文通宋安成王右常侍劉喬墓銘

當時誌與銘或出兩人手故諸家集或有銘無誌或有誌無銘不盡闕缺佚也

丹陽韜聖豐鄉降賢玉葉旣積金徽方傳乃毓伊人克廣
克宣騰芬中屬飛藻上年杳杳虛素永永沖闢雲意霜拍
玉立冰堅家寶以瑩國才未甄參錯報善茫昧雲元歛魂
幽石委氣空山膚若流波身如絕煙芳菲一逝美懋徒鐫
江文通宋光祿大夫孫賈墓銘

川祇効鏡岳祥獻明碧葉獨秀瑤源自清幼炳器譽夙燿
才名體兼遷雲學備儒史紫閣咸趨朱軒旣履貴交慕塵
素遊企軌騰藻上京振彩下國如彼綠蘭秉芬四塞欽人
遷之不平歎天路之冥默貴夫君之爲美播靈均與正則
任彥昇劉先生夫人墓誌

旣稱萊婦亦號鴻妻復有令德一與之齊實佐君子贊蒿

杖藜欣欣負戴在藁之畦居室有行亟聞義讓稟訓丹陽
宏風丞相籍甚二門風流遠尚肇允才淑闡德斯亮蕪沒
鄭鄉寂寥揚豕參差孔樹毫末成拱暫啟荒埏長局幽隴
夫貴妻尊匪爵而重

梁簡文帝華陽陶先生墓誌銘

維大同二年龍集景辰克明三月壬寅朔十二日癸丑巳
時華陽洞陶先生蟬蛻於茅山朱陽館先生諱宏景字通
明春秋八十有一屈伸如恒顏色不變有制贈以中散大
夫謚曰貞白先生遺舍人主書監護喪事十四日巳時窆
於雷平之山若夫真以歸空爲美道以無形爲貴不知悅
生大德所以爲生不知惡死谷神所以不死妙哉隱顯變
化物莫能測旣而岫開折石天墜玉棺銀書息簡流珠罷
鼉九節麗於空中千和焚於地下僊官有得朋之喜受學

振臨谷之悲余昔在粉壤早逢圯上之術今邁元良屢稟
浮邱之教握璽符而惻愴思化杖而酸辛乃爲銘曰

無名曰道不死爲仙亦有元放兼稱稚川遁形解化自昔
同然猗歟夫子受籙歸元梨傳苑吏書因賈船虎車照景
蜺拂淩煙餘花灼爍春澗潺湲鬱鬱茅嶺悠悠洞天三山
白鶴何時復旋

梁簡文帝戎昭將軍劉顯墓銘

繁弱挺質空桑吐聲分器見重播樂傳名誰其均之美有
髦士禮著幼年業明壯齒厭飫典墳研精名理一見弗忘
過日則記若訪賈逵如問伯始穎脫斯出學優則仕議獄
旣佐芸蘭乃握搏鳳池水推羊太學內參禁中外相藩岳
斜光已迫殞彼西浮百川到海還逐東流營營返魄汎汎
虛舟白馬向郊丹旒背鞶野埃興伏山雲輕重呂掩書墳

揚歸元冢爾其戒行途窮士攏弱葛方施叢柯日拱墜柳
黃春禽寒斂翫長空常暗陰泉獨湧耐彼故瑩流芬相踵
梁元帝庾先生承先墓誌

悠哉掌庾與自陶唐伯舅居晉連鑣渭陽爰斯厥後世挺
珪璋乃登靈岳言遵洞府乃涉石山將從輕舉實惟貞吉
實惟退讓皎皎不羣超超高尚本同壽夭寧論得喪諸方
未遊佳城已望蓬生蔣徑釣罷磻谿慚悲新攏挑餘故蹊
風翻嶺背月下松西揚名不朽高蹈夷齊

梁元帝侍中吳平光侯墓誌銘

惟嶽降神表山甫之德敬如君所顯成季之徵潔靜精微
岐疑天挺學義府談均理窟厯太子洗馬八人掌籍爲
崇賢之領袖五日來朝冠承華之楷模遷豫章內史法井
鸞峯甘露歲下蕭崖鶴嶺連理成陰徵爲太子左衛率邁

疾薨於道頗類陶基民號燕北取譬羊祜巷哭荆南副軍
早垂隆昞憫其石火瞻斯翠蓋忽變丹旒方便桓侯石梓
載銘盛夏滕令佳城式鑄韶漢

溫鵬舉司徒元樹墓誌銘

昔樞電降祥姬水成業握八符以馭世膺五命以會昌欽
明格於上下光澤被於宇宙卜年永久厯世遐長有文王
之孫子啟周公之苗裔積善所及踵武稱賢每以辛李爲
言恒持韓白自許殫百慮之一致盡能事於生民蒼蒼在
上義歸無厚徒有東平避世之意空懷北海自晦之情疾
非逢霧終異啟手銘曰
明允篤誠發於岐嶷未鏤已雕不扶而直修理以耕強學
爲殖孔既歎魯莊亦吟越况以度思有懷明發翻然高舉
歸於魏闕長路未窮朝光已沒

徐修仁故永陽敬太妃墓誌銘

永陽大太妃王氏瑯琊臨沂人也其先周靈王之後自秦漢逮於晉宋世戴光□羽儀相屬旣以備於前志故可得而畧焉祖粹給事黃門侍郎父儼左將軍司馬尋陽內史並見稱時輩太妃體中和之氣稟華宗之烈蹈此溫恭表茲淑慎孝敬資於冥發仁愛□於自然至乎四教六訓之閑上言貞婉之德無待教成罔不該備故景行著於中□淑問顯乎言歸作嬪盛德實光輔佐親縫幕之用躬服澣之勤及早世釐居遺孤載藐提攜撫育逮乎成備斷織之訓旣明閨門之禮斯洽劬勞必盡曾不移志用能緝睦於中外亦以宏濟乎艱難雖魯姜之勤節曹妃之敬讓方之蔑如也皇業有造殷憂啟聖追惟魯衛建國永陽恭王纂嗣蕃號式顯乃拜爲太妃策曰維天監二年六月甲午朔

十日癸卯皇帝遣宗室員外散騎侍郎持節兼散騎常侍
蕭敬寶策命永陽王母王氏爲國太妃曰於戲惟爾茂德
內湛粹範外昭國序凝芳蕃庭仰訓是用式遵舊典載章
徽服往欽哉肅茲休烈可不慎歟備綸璣之華而降心彌
約居千乘之貴而處物愈厚旣而恭王不永禮從□□□
訓導嗣孫載光榮祉年高事重志義方隆宜永綏福履而
奄奪鴻慶以普通元年十月廿三日遘疾十一月九日已
卯薨於第春秋五十有九詔曰永陽大太妃奄至薨逝哀
摧切割不能自勝便出叙哀可給東園祕器喪事所須隨
由口辦祖行有辰式宏茂典又詔曰故永陽大太妃禮數
有殊德行惟光訓範蕃嗣式盛母儀卽遠戒期悲懷拙割
可詳典故以隆嘉謚禮也粵其月廿八日戊戌附瘞於瑯
琊臨沂縣長千里黃鵠山用宣風烈以昭弗朽廼爲銘曰

清瀾悠邈其儀尙矣龍光疊照風流世祀猗歟罔匱於昭
不已誕資仁淑作嬪君子幽閑表操明德自躬推厚處薄
秉默居冲參差採芼揜映言工鑒昭彤管識懋休風凝芬
載湛芳猷允塞徙舍爲訓止閤成則曹號母儀豈伊婦德
穆茲閨闔形於邦國龍飛集運禮數攸鍾憲章盛典車服
有容泰而愈約貴則彌恭蕃祉方茂纂嗣克重巾帶差池
朝夕咸事雖曰任傳永請斯備是惟仁姑厥德可庇恂恂
濟濟蘭芬瓊祕光陰易晚祺福難留閨儀罷映綸華奄收
莫遷朱邸駕指行楸芳口是勒大口方攸

北魏崔敬邕墓誌銘

祖秀才諱殊字敬異

夫人從事中郎趙國李休女

父雙護中書侍郎冠軍將軍豫州刺史安平敬侯

夫人中書趙國李誥女

魏故持節龍驤將軍督營州諸軍事營州刺史征虜將軍
大中大夫臨青男崔公之墓誌銘

君諱敬邕博陵安平人也夫其殖姓之始蓋炎帝之允其
在隆周遠祖尙父實作太師秉旄鷹揚尅佐撫殷若乃遠
源之富奕世之美故以備之前冊不待詳錄君卽豫州刺
史安平敬侯之子胄積仁之基累榮構之峻特稟清貞少
播令譽然諾之信著於童孺瑤音玉震聞於弱冠年廿八
而僥華茂實以響流於京夏矣被旨起家召爲司徒府主
簿納贊襁衝能和鼎味俄而轉尙書都官郎中時高祖孝
文皇帝將改制創物大崇革正復以君兼吏部郎詮叙燮
倫九流斯順太和廿二年春宣武皇帝副光崇正妙簡宮
衛復以君爲東朝步兵景明初丁母憂還家居喪致毀幾

於滅性服終朝廷以君膽量凝果善謀好成臨事發奇前
畧無滯微君拜爲左中郎將大都督中山王刺史出圍雋
義陽城拔凱旋君有協規之効功績隆盛授龍驤將軍太
府少卿臨青男忠勲之稱實顯於茲永平初聖主以遼海
戎夷宣化佇賢肅慎契丹必也綏接於是除君持節營州
刺史將軍如故君軒鑣始邁聲猷以先麾蓋踐壇而溫膏
均被於是殊俗知仁荒嶠識澤惠液達於逋遐德潤渾於
邊服延昌四年以君清政懷柔宣風自遠徵君爲征虜將
軍太中大夫方授美任而君嬰疾連歲遂以熙平二年十
一月廿一日卒於位縉紳痛惜嫺舊咸酸依君績行蒙贈
左將軍濟州刺史加謚曰貞禮也孤息伯茂銜哀在疚摧
號罔訢泣庭訓之崩沈淚松楊之以樹洞抽絕其何言刊
遺德於泉路其辭曰

縣哉遐胄帝炎之緒爰厯姬初祖惟尙父曰周曰漢榮光
繼武邁德傳輝儒賢代舉於穆磨考誕質含靈秉仁岳峻
動智淵明育善以和獎幹以貞響發邦上翼起槐庭慶鍾
盛世皇澤遠融入叅彞叙出佐邊戎謀成轅幕績著軍功
僞城憊偃蠢境懷風王恩流賞作捍東荒惠沾海服愛洽
遼鄉天情方渥簡爵惟良如何倉昊國寶淪光白楊晦以
籠雲松區杳而煙邃藐孤叫其崩慙親賓殿而垂淚仰睟
穹而摧號痛尊靈之長祕誌遺德兮何陳篆幽石兮深墜
嗚呼哀哉

北魏故懷令李君墓誌銘

君諱超字景昇本字景宗後承始族叔在江左者懸同故
避改云秦州隴西郡狄道縣都鄉華風里人也雅著高節
敦襲世風言行足師興作成准修情孝友因心名義安貧

樂道息詭遇之襟介然峻特標確焉之操弱冠舉司州秀才拜奉朝請除恒農郡冠軍府錄事叅軍事宰沁水縣巨政崇治綽居尤最爲受罪者所誣章憲臺誤聽被茲深劾除名爲民於是廿年中浮沉間巷玉潔金志卓爾無悶到熙平二年甫更從官補荊州前將軍騎兵叅軍事復作懷令已受拜垂垂述職遭疾正光五年八月十八日卒於洛陽縣之永年里宅時年六十一孤貞華首訖於二邑門從無兩遠邇酸恨懷之百姓長慕喪氣雖陳畱之哀望胡季睿不是過也越六年正月丙午朔十六日辛酉葬洛陽縣覆舟山之東南元壤難窮陵谷時異刻茲陰石照序光塵泱泱顯族斂勞西垂代襲清則沓炳羽儀道妙之門緒風屬斯惟祖惟考倜儻瓌奇昌謨迭駕高獲明規杳量无隄元契不貲總修異貫員應紛枝灼灼伊君山立淵渟棲真

宅正寢繩履程懿錄爲質醇素用情均洽禮世氣重財輕
亦旣從招旁溢鴻聲隨牒出入密勿力誠爰莅近邑先邁
儀形絕交獨坐化動陰冥尙德貽咎衆實叵蓋拂衽歸來
飭轅褫帶恂恂鄉閭万殊一會優柔善成无小无大垂白
再仕汎爾沿流階倫稍降盛業愈邁遙作後城士女承休
轡頓方馳盡土悲愁尅節炯言引賞靡徵端恭妄珥家俗
虛膺擢彼圯跡事罕篇繪長源未輸深圖乍卷蒞此逸機
空生徒返茲寃易削疇毒難遣楨杓疎竦泉房寒遠孀孤
內爛妹弟摧咷式鏤沈石託注幽篆

妻恒農楊氏父談爲邾州主簿息女孟宜年卅六適恒農
王始僑郡中正息女媛姿適遼西常彪侍御史息文仲妃
適武威賈子謠涼州治中息道冲息女婉華息女休顏息
女四輝息道逸年十六息道栖年十三

庾子山周大將軍懷德公吳明徹墓誌銘、

同病相憐故言哀入痛誌文絕唱也

公諱明徹字通昭兗州秦郡人也西都列國長沙王公被
山河東京貴臣大司馬名高霄漢豈直西河有守智足抗
秦建平有城威能動晉而已也祖尙南譙太守父標右軍
將軍抗拒淮沂平夷濟漯代爲名將見於斯矣公志氣縱
橫風情倜儻圯橋取履早見兵書竹林逢猿偏知劍術故
得勇爵登朝材官入選起家東宮司直後除左軍葛瞻始
嗣兵戈仍遭蜀滅陸機縱論功業卽值吳亡公之仕梁末
爲達也自梁受終齊卿得政禮樂征伐咸歸舜後是以威
加四海德教諸侯蕭索煙雲光華日月公以明畧佐時雄
圖贊務鱗翼更張風嚴遂遠冠軍侯之用兵未必師古武
安君之養士能得人心擬於其倫公之謂矣爲左衛將軍

尋遷鎮軍丹陽尹北軍中候總政六師河南京尹冠冕百
郡文武是寄公無愧焉蕭湘之役馮陵島嶼風船火艦周
瑜有赤壁之兵蓋舳舨魏齊有橫江之戰仍爲平南將
軍開府儀同三司都督湘衡桂武四州刺史遂得左廣迴
局麟車反暢長沙楚鐵更入兵欄洞浦藏犀還輸甲庫雖
復戎歌屢凱軍幕猶張淮南望廷尉之囚合淝稱將軍之
寇莫不失穴驚巢沉水陷火爲使持節侍中司空車騎大
將軍都督南北兗青譙五州諸軍事南兗州刺史南平郡
開國公食邑八千戶鼓吹一部中台在元武之宮上將列
文昌之宿高蟬臨鬢吟鷺陪軒平陽之邑萬家臨淄之馬
千駟坐則玉案推食行則中分麾下生平若此功業是焉
旣而金精氣壯師出有名石鼓聲高兵交可遠故得艦舳
所臨蓋於淮泗旌旗所襲奄有龜蒙魏將已奔猶書馬陵

之樹齊師其道空望平陰之烏俄而南仲出車方叔泣止
暢轂文茵鈞膺倬革遂以天道在北南風不競昔者裨將
失律衛將軍於是待罪中軍爭濟荀桓子於焉受戮心之
憂矣胡以事君宣政元年屆於東都之亭有詔釋其鷙鏢
蠲其釁社始宏就館之禮卽受登壇之策拜持節大將軍
懷德郡開國公邑二千戶歸平津之館時聞櫪馬之嘶舍
廣成之傳裁見諸侯之容廉頗眷戀寧聞更用之期李廣
盤桓無復前驅之望霸陵醉尉侵辱可知東陵故侯生平
已矣大象二年七月二十八日氣疾暴增奄然賓館春秋
七十七卽以其年八月十九日寄瘞於京兆萬年縣之東
郊詔贈某官諡某禮也江東八千子弟從項籍而不歸海
島五百軍人爲田橫而俱死焉嗚呼哀哉毛修之埋於塞
表流落不存陸平原敗於河橋死生慚恨反公孫之柩方

且未期歸連尹之尸竟知何日遊魂羈旅足傷溫序之心
元夜思歸終有蘇韶之夢遂使廣平之里永滯冤魂汝南
之亭長聞夜哭嗚呼哀哉乃爲銘曰

九河宅土三江貢職彼美中邦君之封殖負才矜智乘危
恃力浮磬戢鱗孤桐垂翼五兵早竭一鼓前衰移營滅竈
空幕禽飛羊皮詎贖畫馬何追荀罃永去隨會無歸存沒
俄頃光陰懷愴岳裂中台星空上將眷言妻子悠然亭障
魂或可招喪何可望壯志沉淪雄圖埋沒西隴足抵黃塵
碎骨何處池臺誰家風月墳隧羈遠營魂流寓霸岸無封
平林不樹壯士之隴將軍之墓何代何年還成武庫

庾子山周大將軍義興公蕭公墓誌銘

昔司徒之敷五教當堯讓之初丞相之總萬機值秦亡之
後若殷人受氏乃承微子之封梁運應圖實啟延陵之國

公諱太字世怡蘭陵人也太祖文皇帝之孫鄱陽忠烈王之子派別天潢支分若木直幹自高澄源已遠茂親明德是稱毛畢之功宗子維城乃建邢茅之國大同元年年十六封豐城縣開國侯食邑五百戶山臨鶴塞非無陶侃之賓氣連牛斗卽有張華之劍解褐給事中仍太子洗馬公子出身非郎官而同品中朝洗馬異式道而前驅以公居之誠爲高選大同元年入直殿省其年轉太子中書舍人南宮宿衛職司蘭錡北閣從班榮叅顧問通籍兩宮得賢斯在大同三年授持節仁威將軍譙州刺史褰帷祥氣之境刺舉消憂之地南陽風俗文學更多美稷相迎童兒逾遠旣而亂離瘼矣王室騷然大夫有行役之悲君子有無期之怨背關懷楚扁舟而行江漢奉當璧之君章華歸中興之主承聖元年拜侍中無雙對問實跡武於丁鴻多識

舊章足齊衡於王粲二年除持節平西將軍臨川內史仍
轉平南將軍桂陽內史尙方鑄劍再轉金龜御史分符雙
封銅虎豈直鄧攸清白見稱五鼓之歌劉寵廉能名爲一
錢之郡遂以天保未定王途多梗還吳不可歸蜀無路臨
淄負海翻然改途竄身清漳垂翅渤海蒙授車騎大將軍
散騎常侍仍爲持節都督永州刺史而秦亭壓境邾析聞
城鼓角地鳴將軍天落雖復甌缶聽聲無防於地道冠繩
柴結不却於雲梯請命受降翻歸都護周朝以楚材晉用
不停於平章趙璧秦求無論於羈遠以保定五年除使持
節驃騎大將軍開府儀同三司義興郡開國公食邑一千
三百戶天和二年授使持節都督蔡州諸軍事蔡州刺史
楚頃襄之愛子旣布衣而成谷魏安釐之母弟亦羈旅於
邯鄲憂旣傷人降年不永春秋五十有一薨於蔡州之鎮

送故入關空餘袞服歸軒在道還更垂帷嗚呼哀哉有詔
贈官諡某禮也五年十一月葬於長安北原櫟里子之墳
正臨武庫太史公之墓直對臯門銘曰

元鳥遠烈相土宏謨東封宋社西歛秦圖人承佐漢國紹
開吳有美令德茂親藩邸建國皇支承家帝弟率由冥會
亮直天啟轅固聞詩唐都習禮博望之苑金華之宮文林
講德武帳叅戎名書柱上策滿帷中託身淄右蒞政淮東
秦亭西逼楚澤南窮時驚獵火或懼秋風屬期遠畧逢茲
應變陣橫十里兵圍一面月暈孤城塵驚虛援春筍非糧
秋蒿無箭垂翅卧龍夷衿輟戰時值懷來恩加始賞王爵
愈峻戎章更上朱鷺才飛虞歌卽嚮泣子留恨藏書長往
炎涼迭運零落山邱霜芬幕月松氣陵秋嗟南國之王子
成東陵之故侯

庾子山周大將軍瑯琊定公司馬裔墓誌銘

公諱裔字遵允河內溫人也南正司天北正司地是謂義和之官卽嗣重黎之政邛之歸楚與章邯而並封豫之避秦共毛公而俱去祖金龍仍居選部水鏡三臺父悅再牧荆河威風千里而身遭禍機遂爲季布所哭獲存遺嗣實賴程嬰之忠國家追念功臣更撫叔敖之子言思官族還求女齊之允公始應辟爲河內功曹除員外郎常侍汲郡治兵黃河浮馬摧鋒軹關之捷逐北長城之陣授平東將軍北徐州刺史柳泉風塵三城席卷棠陰鋒鏑千室入關遷車騎大將軍僕同三司開國龍門縣伯仍除巴州刺史雖復巴水三迴夷歌數曲徒逢白竹之弩已濟青衣之功朝廷以漢之功臣須開上將之府晉之代胄宜紹瑯琊之國遷驃騎大將軍開府改封瑯琊公食邑一千五百戶宮

闡近密實侯忠貞詔爲大御伯仍除大御正職司常伯任
總夔龍王道旣平絲言惟允尋除始州刺史都督始州諸
軍事蠻夷恃險狼顧鴟張高山尋雲深谷無景九地縱橫
三門起伏峯危馬束水險橋飛遂得谷靜山空水消霧散
仍爲信州刺史都督信州諸軍事精兵守於白帝足懼巴
州之城船梯下於荊州彌動西陵之戍卽授使持節大將
軍都督西寧州諸軍事西寧州刺史將啟北戶之人向通
雲南之國聞寵若驚奄從深夜天和六年正月十八日亡
春秋六十五詔贈本官加懷邵汾晉四州刺史諡定公禮
也以建德元年七月十三日葬於武功郡之三疇原公愛
敬純深有隱無犯忠貞亮直知無不爲在戎四十二年身
經六十九戰至於多竈唱籌並得成功飛沙擁石未嘗乖
律恂恂教義吳起西河之風閑閑旗鼓李牧長平之政身

死之日家無餘財山水所資一由詔葬有始有卒生榮死哀銘曰

祝融是命重黎克舉公族乃建天官卽序避世於秦成家於楚金行失馭玉鏡淪輝我之烈祖識變乘機黃旗東沒青蓋西飛落星置道長州出圍及我皇父荊河再撫世遭喪亂身沒猾豎嗟我遺嗣崎嶇趙武寒覆鳥翼飢吞獸乳獲歸河內更襲瑯琊年方小馬怨結長蛇藏兵九地置劍千家雪山埋馬冰河陷車旣乃班政超然榮守朱鷺頻飛金龜轉紐築塞長榆營軍高柳玉案推食河橋勸酒石門冰釋金隄電散蘆水門關茅津成觀馭風逸翮修途始半建武功臣先悲吳漢沉寥搖落游揚浸微金城路斷郿塢人稀風松雲蓋白水山衣賢已星隕人沒蘭衰

庾子山周譙國公夫人步陸孤氏墓誌銘

夫人諱某字某本姓陸孤郡人也大夫拓境百越來庭丞相勒兵三江席卷高祖載爲劉義真長史畱鎮關中旣沒赫連因卽仕魏臨終誠其子孫曰樂操風土不忘本也言念爾祖無違此心祖政驃騎大將軍儀同三司恒州刺史父通柱國大將軍大司馬文安公匡贊經綸叅謀揖讓名高廣武功重長平夫人七德含章四星連曜敬愛天情言容禮典九日登高作錦秋菊三元告始或頌春椒年十有四娉於譙國友其琴瑟愈恭節儉之心伐其條枚實秉憂勤之德鄰地登高之錦自濯江波平陽采桑之津躬勞蠶月天和元年冊拜譙國夫人東武亭之妻旣稱有秩南城侯之婦還聞受封柱國殿下以名華分照增城峻土揚旌輿道問政叩都白狼之溪途艱黃牛之坂荔枝之山地險葡萄之國夫人別離親戚關河重阻夷歌一曲未足消憂

猿鳴三聲沾衣無已是以天鴈之疾遂成沉痾玉瀝難開
金膏實遠建德元年七月九日薨於成都私第春秋二十
有一卽以其年十一月二十二日歸葬長安之北原詔贈
譙國夫人禮也殿下神傷秋月掩淚長松周季直之畱書
更深冥漠潘安仁之詞藻徒增哀怨豈直西河女子獨見
銀臺東海婦人先逢金闕銘曰

芟陵反旆椒山止戈金精據嶺昌閭凌波西遊卿相東裂
山河華亭冠冕穀水絃歌震維徙族燕垂從宦塞入飛狐
關連鳴雁策頂登阜功叅臨澗寶鼎畱銘彫戈餘贊應圖
淑令秉禮言歸魚軒馮軾澤雉文衣明月照鏡仙石支機
行雲細起迴雪輕飛北降帝子南麾蜀守若水旣開靈山
已鏤月峽猿啼江神牛鬪星機北轉日轡西迴陽泉伏氣
陰律沉灰鶴辭吳市鳳去秦臺神光離合燈影徘徊雙流

反葬百兩迴旌少女離位夫人去城帷堂野設帳殿郊營
山川奇事風月無情搖落邱隴荒涼封域樹樹秋聲山山
寒色草短逾平松長轉直節墳方固園陵永植

庾子山周太傅鄭國公夫人鄭氏墓誌銘

夫人諱某滎陽開封縣遠里人也七子賦詩足光賓客三
卿從政實靜諸侯駟乘則晉后停輿來朝則漢君識履華
胄蟬聯無虛史籍祖那秦州別駕父茂伯撫軍將軍涼州
刺史伯陽縣侯夫人令淑早聞芝蘭獨茂旣容旣德言告
言歸悌實溫清恭惟箴壺太傅弼諧周室股肱攸寄夫人
輔佐君子勤勞是司琴瑟旣友條枚無伐故得用之邦國
成之孝敬某年月日封鄭國夫人瑜翟旣加紘紼是務夫
有安世之貴躬服浣濯子有文伯之尊無忘機杼表裏惟
安閨闈且正醫門有疾對藥無徵天和三年三月二十日

薨葬於長安之石安原世子某兄弟並勗慈訓咸遵母儀
霜露深悲寒泉增慟銘曰

居德圃田當官教府置騎賓來開黌學聚福履家室賢才
踵武棠棣之華螽斯之羽人倫七德風化二南采采芣苢
萋萋葛覃節行聲玉副笄珈蓼柳園秉杼桑津浴蠶春秋
超忽零落無時家亡淑女國喪賢姬香墳永送舞鶴長辭
山深月闇風急松悲千年開閉將驗靈龜

蔡伯喈爲陳留上孝子狀

臣前到官博問掾史孝行卓異者臣門下掾申屠曼稱孝
子平邱程末年十四歲時祖父叔病歿未抱伏叔尸號泣
悲哀口乾氣少喘息纔屬舅偃哀其羸劣嚼棗肉以哺之
未見食噓唏不能吞咽麥飯寒水乃間用之舅偃誘勸哽
咽益甚是後精美異味遂不過口常在柩旁耳聞叔名目

應以淚前太守文穆召署孝義童云以叔未葬不能至府
舍臣輒核問掾史邑子殷盛宿彥等辭驗皆合臣卽召來
見末年十四歲顏色瘦小應對甚詳臣問樂爲吏否垂泣
求去白歸喪所臣爲設食但用麥飯寒水不食肥膩舅本
以田作爲事家無典學者其至行發於自然非耳目間見
所做効也雖成人之年知禮識義之士恐不能及伏惟陛
下體因心之德當中興之運躬秉萬機建用皇極神紀騁
於無方淑暢洽於羣生故醇行感時而生美義因政而出
清風奮揚休徵誕漫太平之萌昭驗已著臣誠伏見幸甚
臣聞魯侯能孝命於夷宮張仲孝友侯在左右周宣之興
實始於此且烏以反哺託體太陽羔以跪乳爲贊國卿禽
獸之微猶以孝寵况未稟純粹之精爽立百行之根源其
人隱瘁而德曜彌光其族益章臣不勝願會使未美昭顯

本朝謹陳狀臣邕頓首

任彥昇齊竟陵文宣王行狀

以儷詞述實事於斯體尙稱

祖太祖高皇帝

父世祖武皇帝

南徐州南蘭陵郡縣都鄉中都里蕭公年三十五行狀

公道亞生知照隣幾庶孝始人倫忠爲令德公實體之非
毀譽所至天才博瞻學綜該明至若曲臺之禮九師之易
樂分龍趙詩析齊韓陳農所未究河間所未輯有一於此
罔不兼綜者與昔沛獻訪對於雲臺東平齊聲於楊史淮
南取貴於食時陳思見稱於七步方斯蔑如也初沈攸之
跋扈上流稱亂陝服宋鎮西晉熙王南中郎邵陵王並鎮
湓口世祖與贊兩藩而任總西伐公時從在軍鎮西府版

寧朔將軍軍主南中郎版補行參軍署法曹於時景燭雲
火風馳羽檄謀出股肱任切書記遷左軍邵陵王主簿記
室叅軍既允焚林之求實兼儀形之寄刀筆不足宣功風
體所以宏益除邵陵王友又爲安南邵陵王長史東夏形
勝關河重復選衆而舉敦悅斯在除使持節都督會稽東
陽臨海永嘉新安五郡諸軍事輔國將軍會稽太守太祖
受命廣樹藩屏公以高昭武穆惟戚惟賢封閭喜縣開國
公食邑千戶又以奏課連最進號冠軍將軍越人之巫覩
正風而化俗篁竹之酋感義讓而失險邪叟忘其西戾龍
邱狹其東臯會武穆皇后崩公星言奔波泣血千里水漿
不入於口者至自禹穴逮衣裳外除心哀內疚禮屈於厭
降事迫於權奪而茹戚肌膚沈痛瘡鉅故知鐘鼓非樂云
之本壤纘非隆殺之要改授征虜將軍丹陽尹良家入徙

戚里內屬政非一軌俗備五方公內樹寬明外施簡惠神
臯載穆轂下以清武皇帝嗣位進封竟陵郡王食邑如千
戶復授使持節都督南徐兗二州諸軍事鎮北將軍南徐
州刺史遷使持節侍中都督南兗徐北兗青冀五州諸軍
事征北將軍南兗州刺史兗徐接壤素漸河濶未及下車
仁聲先洽玉關靖柝北門寢扃朝旨以董司岳牧敷興邦
教方任雖重比此爲輕徵護軍將軍兼司徒侍中如故又
授車騎將軍兼司徒侍中如故卽授司徒侍中又如故上
穆三能下敷五典闢元闢以闢化寢鳴鐘以體國翼亮孝
治緝熙中教奪金趾訟蹊田自嘿不彫其朴用晦其明聲
化之有倫繫公是賴庠序肇興儀刑國胄師氏之選允歸
人範以本官領國子祭酒固辭不拜八座初啟以公補尙
書令式是敷奏百揆時序夫國家之道互爲公私君親之

義遞爲隱犯公二極一致愛敬同歸亮誠盡規謀猷宏遠
矣又授使持節都督揚州諸軍事揚州刺史本官悉如故
舊惟淮海今則神牧編戶殷阜萌俗滋繁不言之化若門
到戶說矣頃之解尚書令改授中書監餘悉如故獻納樞
機絲綸允緝武皇晏駕寄深負圖公仰惟國典俛遵遺託
俯擗天倫踊絕於地居處之節復如居武穆之憂聖王嗣
興地居旦爽有詔策授太傅領司徒餘悉如故坐而論道
動以觀德地尊禮絕親賢莫貳又詔加公入朝不趨讚拜
不名劔履上殿蕭傅之賢曹馬之親兼之者公也復以申
威重道增崇德統進督南徐州諸軍事餘悉如故並奏疏
奏上身沒讓存天不憖遺梁岳頽峻某年某月日薨春秋
卅有五詔給溫明秘器斂以袞章備九命之禮遣大鴻臚
監護喪事朝夕奠祭大官供給禮也故以慟極津門感充

長樂豈徒春人不相傾壘罷肆而已哉乃下詔曰褒崇庸
德前王之令典追遠尊厥法情之所隆故使持節都督揚
州諸軍事中書監太傅領司徒揚州刺史竟陵王新除進
督南徐州體睿履正神監淵邈道冠民宗具瞻惟允肇自
弱齡孝友光備爰及贊契協升景業燮和台曜五教克宣
敷奏朝端百揆惟穆寄重先顧任均負圖諒以齊徽二南
同規往哲方憑保佑永翼雍熙天不憖遺奄見薨落哀慕
抽割震動於厥心今先遠戒期龜謀襲吉茂崇嘉制式宏
風猷可追崇假黃鉞侍中都督中外諸軍事太宰領大將
軍揚州牧綠綬綬具九錫服命之禮使持節中書監王如
故給九旒鑾輅黃屋左纛輜輳車前後部羽葆鼓吹挽歌
二部虎賁班劍百人葬禮一依晉安平獻王孚故事公道
識虛遠表裏融通淵然萬頃直上千仞僕妾不覩其喜愠

近侍莫見其傾弛他人之善若已有之民之不臧公實貽
耻誘接恂恂降以顏色方於事上好下規已而廉於殖財
施人不倦帝子儲季令行禁止國綱天憲寘諸掌握未嘗
鞠人於輕刑錮人於重議人有不及內恕諸已非意相干
每爲理屈任天下之重體生民之俊華袞與緼繻同歸山
藻與蓬茨俱逸良田廣宅符仲長之言邱山洛水協應叟
之志邱園東國錙銖軒冕乃依林構宇傍巖拓架清爰與
壺人爭旦緹幙與素澗交輝置之虛室人野何辨高人何
點躡屩於鍾阿徵士劉虬獻書於衡岳贈以古人之服宏
以度外之禮屈以好士之風申其趨王之意乃知大春屈
已於五王君大降節於憲后致之有由也其卉木之奇泉
石之美公所製山居四時序言之已詳文皇帝養德東朝
同符作者爰造九言實該百行遵衿襍於未萌申炯戒於

茲日非直旦暮千載故乃萬世一時也命公注解衛將軍
王儉綴而序之山宇初構超然獨往顧而言曰死者可歸
誰與入室尙想前良俾若神對乃命畫工圖之軒牖旣而
緬屬賢英傍思才淑匹婦之操亦有取焉有客游梁朝者
從容而進曰未見好德愚竊惑焉卽命刊削投杖不暇公
以爲出言自口驥驟不追聽受一謬差以千里所造箴銘
積成卷軸門階戶席寓物垂訓先是震於外寢匠者以爲
不祥將加治葺公曰此天譴也無所改修以記吾過且令
戒懼不怠從諫如順流虛己若不足至於言窮藥石若味
滋旨信必由中貌無外悅貴而好禮怡寄典墳雖牽以物
役孜孜無怠乃撰四部要畧淨住子並勒成一家懸諸日
月宏洙泗之風闡迦維之化大漸彌留話言盈耳黜殯之
請至誠懇惻豈古人所謂立言於世沒而不朽者歟易名

馬二十一
之典請遵前烈謹狀

沈休文齊司空柳世隆行狀

公稟靈華嶽幼挺珪璋清襟素履發乎韶卣及長風質洞
遠儀止祥華動容合矩吐言被律時沈攸之狼據陝西氣
陵物上而太祖登庸作宰天厯在躬攸之播封豕之情總
全荆之力兕甲十萬鐵馬千羣水陸長驚志窺皇邑公抗
威川渙勇畧紛紜顯晦有方出沒無緒攸之乃反旆巨圍
親受矢石增櫓乘埤嚴衝駕雉雲輞俯闕地穴斜通半藏
晚餐負戶晨汲公乃綏衆以武應敵以奇靈鋒電曜威策
雲舉事切三版之危氣損九天之就殘寇外老逆黨內摧
焚舟委甲掬指背遯公風標秀徹器範宏潤茂乎辭彩雅
善鼓琴摘純蔡之高芬纂鍾嵇之妙曲雖嬰拂世務而素
業無改臨姑蘇而想八桂登衡山而望九疑七紆邦組三

臨蕩旬五職瑞扇一司百揆固可以齊衡八凱方駕五臣
江文通建平王太妃周氏行狀

竊聞侯服之譽非黃冠能敷王食之門寧皂衣所述諒畏
褒虛美於君后被空名於鼎貴然有漢臣諫行晉史書德
者亦云實而已焉伏見國太妃稟靈惟岳集慶自遠世擅
淮汝族冠疇代故以載曜聲書式炳滕牒矣太妃誕異離
之正和函雲露之中氣凝采韶歲賁章笄年若廼彤管女
圖之學纂組綺縞之工升降處謙之儀柔靜居順之節
莫不中道若性不嚴而成故譽滿闈闕聲聞軒殿以元嘉
某年歸於故司徒宣簡王旣而第高恒倫秩踰外品青軒
華轂用光國輝素壁丹墀實隆家貴具惟嫺娣靡不式瞻
而居尊以簡訓卑以宏躬謹蘭閨身攜椒第若衛娥之炯
行樊嬴之英操方之蔑如也大明二年宣簡王薨太妃藉

悲用禮撫孤用慈柔懿之德愈彰肅敬之間日被雖文伯之母言不踰闕宮相之王行存乎勤無以過也大明某年拜建平王太妃是時今王春秋方富德業未隆藉茲金響終能玉播故綺襦出宰弱冠升朝者亦太妃劬勞之訓也謂天益高降年不永以太豫元年二月三日薨於荊州內寢凡厥遠邇以哀以歎今祖行有期泉窆無遠素旌望路綵旌思歸所以垂宣徽容髣髴金石者謹牒行狀具以申言

合河蕭氏
刻梓家譜

駢體文鈔卷二十六

誄祭類

張平子大司農鮑德誄

昔君烈祖平顯奕世敬叔生牙美管交賴至于中葉種德以邁種德伊何去虛適參建旄屯留其茂如林降及我君總角有聲遺蒙萬穀龍祿斯丁守約勤學克勞其形濬哲之資日就月成業業學徒童蒙求我舍厥徃著去風卽雅濟濟京河實爲西魯昔我南都惟帝舊鄉同于郡國殊於表章命親如公弁冕鳴璫若惟允之實耀其光導以仁惠教以義方習射矍相饗老虞庠羌髦作虐艱我西鄰君斯整旅耀武月頻蠶蠶戎虜是罔是震知德者鮮惟君克舉旣厭帝心將處台輔命有不永時不我與天實爲之孰其能禦股肱或毀何痛如之國喪遺愛如何無思

曹子建王仲宣誄

建安二十二年正月二十四日戊申魏故侍中關內侯王君卒嗚呼哀哉皇穹神察詰人是恃如何靈祇殲我吉士誰謂不痛早世卽冥誰謂不傷華繁中零存亡分流天遂同期朝聞夕沒先民所思何用誄德表之素旗何以贈終哀以送之遂作誄曰

猗歟侍中遠祖彌芳公高建業佐武伐商爵同齊魯邦祀絕亡流裔畢萬勲績惟光晉獻賜封于魏之疆天開之祚未胄稱王厥姓斯氏條分葉散世滋芳烈揚聲秦漢會遭陽九炎光中矇世祖撥亂爰建時雍三台樹位履道是鍾寵爵之加匪惠惟恭自君二祖爲光爲寵僉曰休哉宜翼漢邦或統太尉或掌司空百揆惟敘五典克從天靜人和皇教遐通伊君顯考奕葉佐時入管機密朝政以治出臨朔岱庶績咸熙君以淑懿繼此洪基既有令德材技廣宣

強記洽聞幽讚微言文若春華思若涌泉發言可詠下筆
成篇何道不治何藝不閒碁局逞巧博奕惟賢皇家不造
京室隕顛宰臣專制帝用西遷君乃羈旅離此阻艱翕然
鳳舉遠竄荆蠻身窮志達居鄙行鮮振冠南嶽濯纓清川
潛處蓬室不干勢權我公奮鉞耀威南楚荆人或違陳戎
講武君乃義發算我師旅高尙霸功投身帝宇斯言旣發
謀夫是與是與伊何嚮我明德投戈編郡稽顙漢北我公
實嘉表揚京國金龜紫綬以彰勲則勲則伊何勞謙靡已
憂世忘家殊畧卓峙乃署祭酒與軍行止算無遺策畫無
失理我王建國百司雋乂君以顯舉秉機省闔戴蟬珥貂
朱衣皓帶入侍帷幄出擁華蓋榮曜當世芳風晚謫嗟彼
東夷憑江阻湖騷擾邊境勞我師徒光光戎路霆駭風徂
君侍華轂輝輝王途思榮懷附望彼來威如何不濟運極

命衰寢疾彌留吉往凶歸嗚呼哀哉翩翩孤嗣號慟崩摧
發軔北魏遠迄南淮經歷山河泣涕如頽哀風興感行雲
徘徊游魚失浪歸鳥忘栖嗚呼哀哉吾與夫子義貫丹青
好和琴瑟分過友生庶幾遐年攜手同征如何奄忽棄我
風零感昔宴會志各高厲子戲夫子金石難弊人命靡常
吉凶異制此驩之人孰先隕越何寤夫子果乃先逝又論
死生存亡數度子猶懷疑求之明據儻獨有靈游魂泰素
我將假翼飄飄高舉超登景雲要子天路喪柩旣臻將反
魏京靈輜回軌白驥悲鳴虛廓無見藏景蔽形孰云仲宣
不聞其聲延首歎息雨泣交頸嗟乎夫子永安幽冥人誰
不沒達士殉名生榮死哀亦孔之榮嗚呼哀哉

曹子建仲雍哀辭

曹喈字仲雍魏太子之仲子也三月而生五月而亡昔后

稷之在寒冰圃穀之在楚澤咸依鳥馮虎而無風塵之灾
今之元締文茵無寒冰之慘羅幃綺帳暖於翔鳥之翼幽
房閑宇密於雲夢之野慈母良保仁乎鳥虎之情卒不能
延期於暮載雖六旬而天殃彼孤蘭之眇眇亮成幹其畢
榮哀綿綿之弱子早背世而潛形且四孟之未周將愿之
乎一齡陰雲回於素蓋悲風動其扶輪臨埏闔以歔歔淚
流射而沾巾

潘安仁楊荊州誄

維咸寧元年夏四月乙丑晉故折衝將軍荊州刺史東武
戴侯榮陽楊使君薨嗚呼哀哉夫天子建國諸侯立家選
賢與能政是以和周賴尚父殷憑太阿矯矯楊侯晉之爪
牙忠節克明茂績惟嘉將宏王畧肅清荒遐降年不永元
首未華銜恨沒世命也奈何嗚呼哀哉自古在昔有生必

死身沒名垂先哲所避行以號彰德以述美敢託旒旗爰
作斯誄其辭曰

邈矣遠祖系自有周昭穆繁昌枝庶分流族始伯喬氏出
楊侯奕世丕顯允廸大猷天厭漢德龍戰未分伊君祖考
方事之殷烏則擇木臣亦簡君投心魏朝策名委身奮躍
淵塗跨騰風雲或統驍騎或據領軍篤生戴侯茂德繼期
纂我洪緒克構堂基弱冠味道無競惟時孝實蒸蒸友亦
怡怡多才豐藝彊記洽聞目睇毫末心算無垠草隸兼善
尺牘必珍足不輟行手不釋文翰動若飛紙落如雲學優
則仕乃從王政散璞發輝臨軹作令化行邑里惠洽百姓
越登司官肅我朝命惟此大理國之憲章君蒞其任視民
如傷庶獄明慎刑辟端詳聽參臯呂稱侔于張改授農正
于彼野王倉盈庾億國富兵強煌煌文后鴻漸晉室君以

兼資參戎作弼用錫土宇膺茲顯秩青社白茅亦朱其紱
魏氏順天聖皇受終烈烈楊侯實統禁戎司管閭闔清我
帝宮苛慝不作穆如和風謂督勲勞班命彌崇茫茫海岱
元化未周滔滔江海疆場分流秉文兼武時惟楊侯旣守
東莞乃牧荊州折衝萬里對揚王休聞善若驚疾惡如讐
示威示德以伐以柔吳夷凶侈僞帥畏逼將承讐覺席卷
南極繼襄糧盡神謀不忒君子之過引曲推直如彼日月
有時則食負執其咎功讓其力亦旣旋旆爲法受黜退守
邱塋杜門不出游目典墳縱心儒術祁祁搢紳升堂入室
靡事不咨無疑不質位貶道行身窮志逸弗慮弗圖乃寢
乃疾昊天不弔景命其卒嗚呼哀哉予曩佐楚遺言城郢
史魚諫衛以尸顯政伊君臨終不忘忠敬寢伏牀蓐念在
朝廷朝達厥辭夕隕其命聖王嗟悼寵贈衾綖誅德策勲

考終定謚羣辟慟懷邦族揮淚孤嗣在疾寮屬含悴赴者
同哀路人增歔嗚呼哀哉余以頑蔽覆露重陰仰追先考
執友之心俯感知己識達之深承諱忉怛涕淚霑襟豈忘
載奔憂病是沈在疾不省於亡不臨舉聲增慟哀有餘音
嗚呼哀哉

潘安仁楊仲武誄

楊綬字仲武滎陽宛陵人也中領軍肅侯之曾孫荊州刺
史戴侯之孫東武康侯之子也八歲喪父其母鄭氏光祿
勳密陵成侯之元女操行甚高恤養幼孤以保父家而
免諸艱難戴侯康侯多所論著又善草隸之藝子以妙年
之秀固能綜覽義旨而軌式模範矣雖舅氏隆盛而孤貧
守約心安陋巷體服菲薄余甚竒之若乃清才雋茂盛德
日新吾見其進未見其已也既藉三葉世親之恩而子之

姑余之伉儷焉往歲卒於德宮里喪服周次綢繆累月苟人必有心此亦欵誠之至也不幸短命春秋二十九元康九年夏五月己亥卒嗚呼哀哉乃作誄曰

伊子之先奕葉熙隆惟祖惟曾載揚休風顯考康侯無祿早終名器雖光勲業未融篤生吾子誕茂淑姿克岐克嶷知章知微鉤深探賾味道研幾匪直也人邦家之輝子之遘閔曾未齟髻如彼危根當此衝飈德之休明靡幽不喬弱冠流芳雋聲清劭爾舅惟榮爾宗惟瘁幼秉殊操違豐安匱撰錄先訓俾無隕墜舊文新藝罔不畢肄潘楊之穆有自來矣矧乃今日慎終如始爾休爾戚如實在已視子猶父不得猶子敬亦旣篤愛亦旣深雖殊其年實同厥心日昃景西望子朝陰如何短折背世湮沈嗚呼哀哉寢疾彌留守茲孝友臨命忘身顧戀慈母哀哀慈母痛心疾首

嗷嗷同生悽悽諸舅春蘭擢莖方茂其華荆寶挺璞將剖
于和含芳委耀毀璧摧柯嗚呼仲武痛哉奈何德宮之艱
同次外寢惟我與爾對筵接枕自時迄今曾未盈稔姑姪
繼隕何痛斯甚嗚呼哀哉披帙散書屢觀遺文有造有寫
或草或真執玩周復想見其人紙勞于手涕沾于巾龜筮
旣襲挺隧旣開痛矣楊子與世長乖朝濟洛川夕次山隈
歸鳥頽頽行雲徘徊臨穴永訣撫櫬盡哀遺形莫紹增慟
余懷魂兮往矣梁木實摧嗚呼哀哉

潘安仁夏侯常侍誄

夏侯湛字孝若譙人也少知名弱冠辟太尉府賢良方正
徵仍爲太子舍人尚書郎野王令中書郎南陽相家艱乞
還頃之選爲太子僕未就命而世祖崩天子以爲散騎常
侍從班列也春秋四十有九元康元年夏五月壬辰寢疾

卒于延喜里第嗚呼哀哉乃作誄曰

禹錫玄珪寶曰文命克明克聖光啟夏政其在于漢邁勲
惟嬰思宏儒業大小雙名顯祖曜德牧宥及荆父守淮岱
治亦有聲英英夫子灼灼其鵠飛辯摘藻華繁玉振如彼
隨和發彩流潤如彼錦纈列素黠絢人見其表莫測其裏
徒謂吾生文勝則史心照神交唯我與子且歷少長逮觀
終始子之承親孝齊閔參子之友悌和如瑟琴事君直道
與朋信心雖實唱高猶賞爾音弱冠厲翼羽儀初昇公弓
旣招皇輿乃徵內贊兩宫外宰黎蒸忠節允著清風載興
泱彼樂都寵子惟王設官建輔妙簡邦良用取喉舌相爾
南陽惠訓不倦視民如傷乃眷北顧辭祿延熹余亦偃息
無事明時疇昔之遊二紀于茲斑白攜手何歡如之居吾
語汝衆實勝寡人惡雋異俗疵文雅執戟疲揚長沙投賈

無謂爾高恥居物下子乃洗然變色易容慨然歎曰道固不同爲仁由己匪我求蒙誰毀誰譽何去何從莫湏匪緇莫磨匪磷子獨正色居屈志申雖不爾以猶致其身獻替盡規媚茲一人讜言忠謀世祖是嘉將僕儲皇奉轡承華先朝末命聖列顯加入侍帝闈出光厥家我聞積善神降之吉宜享遐紀長保天秩如何斯人而有斯疾曾未知命中年隕卒嗚呼哀哉唯爾之存匪爵而貴甘食美服重珍兼味臨終遺誓永錫爾類歛以時襲殯不簡器誰能拔俗生盡其養孰是養生而薄其葬淵哉若人縱心條暢傑操明達困而彌亮軀軀旣祖容體長歸存亡永訣逝者不追望子舊車覽爾遺衣幅抑失聲迸涕交揮非子爲慟吾慟爲誰嗚呼哀哉日往月來暑退寒襲零露沾凝勁風淒急慘爾其傷念我良執適子素館撫孤相泣前思未弭後感

仍集積悲滿懷逝矣安及嗚呼哀哉

潘安仁馬汧督誄

惟元康七年秋九月十五日晉故督守關中侯扶風馬君
卒嗚呼哀哉初雍部之內屬羌反未弭而編戶之氏又肆
逆焉雖王旅致討終於殄滅而蜂蠆有毒驟失小利俾百
姓流亡頻於塗炭建威喪元於好時州伯宵遁乎大谿若
夫偏師裨將之隕首覆軍者蓋以十數剖符專城紆青拖
墨之司奔走失其守者相望於境秦隴之僭輦更爲魁旣
已襲汧而館其縣子以眇爾之身介乎重圍之裏率寡弱
之衆據十雉之城羣氏如蝟毛而起四面雨射城中城中
鑿穴而處負戶而汲木石將盡樵蘇乏竭芻蕘罄絕於是
乎發梁棟而用之弓以鐵鑲機關旣縱礮而又昇焉爨陳
焦之麥柿枳桷之松用能薪芻不匱人畜取給青煙傍起

機馬長鳴凶醜駭而疑懼乃闕地而攻子命穴浚塹寘壺
鑄瓶無以偵之將穿響作因焚積火薰之潛氏殲焉久之
安西之救至竟免虎口之厄全數百萬石之積文契書於
幕府聖朝疇咨進以顯秩殊以幢蓋之制而州之有司乃
以私隸數口穀十斛考訊吏兵以櫜楚之辭連之大將軍
屢抗其疏曰敦固守孤城獨當羣寇以少禦衆載離寒暑
臨危奮節保穀全城而雍州從事忌敦勲效極推小疵非
所以褒獎元功宜解敦禁劾假授詔書遽許而子固已下
獄發憤而卒也朝廷聞而傷之策書曰皇帝咨故督守關
中侯馬敦忠勇果毅率厲有方固守孤城危逼獲濟寵秩
未加不幸喪亡朕用悼焉今追贈牙門將軍印綬祠以少
牢魂而有靈嘉茲寵榮然絜士之聞機其庸致思乎若乃
下吏之肆其噤害則皆妬之徒也嗟乎妬之欺善抑亦貿

首之讐也語曰或戒其子慎無爲善言固可以若是悲夫
昔乘邱之戰縣貲父御魯莊公馬驚敗績貲父曰他日未
嘗敗績而今敗績是無勇也遂死之閭人浴馬有流矢在
白肉公曰非其罪也乃誅之漢明帝時有司馬叔持者白
日於都市手劍父讐視死如歸亦命史臣班固而爲之誄
然則忠孝義烈之流慷慨非命而死者綴辭之士未之或
遺也天子旣已策而贈之微臣託乎舊史之末敢闕其文
哉乃作誄曰

知人未易人未易知嗟茲馬生位末名卑西戎猾夏乃奮
其奇保此汧城救我邊危彼邊奚危城小粟富子以眇身
而裁其守兵無加衛墉不增築焚焚羣狄豺虎競逐輦更
恣睢潛跼官寺齊萬樵闕震驚台司聲勢沸騰種落煽熾
旌旗電舒戈矛林植彤珠星流飛矢雨集惴惴士女號天

以泣爨麥而炊負戶以汲累卵之危倒懸之急馬生爰發
在險彌亮精貫白日猛烈秋霜稜威可厲懦夫克壯霑恩
撫循寒士挾纊蠶蠹犬羊阻衆陵寡潛隧密攻九地之下
愜愜窮城氣若無假背命懸天今也惟馬惟此馬生才博
智瞻偵以瓶盞則以長漣鍾未見鋒火以起焰薰尸滿窟
拊穴以斂木石匱竭箕稗空虛矍然馬生傲若有餘蜀梁
爲礪梯松爲芻守不乏械櫜有鳴駒哀哀建威身伏斧質
悠悠列將覆軍喪器戎釋我徒顯誅我師以生易死疇克
不二聖朝西顧關右震惶分我汧庾化爲寇糧實賴夫子
思誓彌長咸使有勇致命知方我雖末學聞之前典十世
宥能表慕旌善思人愛樹甘棠勿翦矧乃吾子功深疑淺
兩造未具儲隸益鮮孰是勲庸而不獲免猗哉部司其心
反側斲善害能醜正惡直牧人逶迤自公退食聞穢鷹揚

曾不戢翼忘爾大勞猜爾小利苟莫開懷于何不至慨慨
馬生碩碩高致發憤圖圖沒而猶眠嗚呼哀哉安平出奇
破齊克完張孟運籌危趙獲安汧人賴子猶彼談單如何
吝嫉搖之筆端傾倉可賞矧云私粟狄隸可頒况曰家僕
剔子雙龜貫以三木功存汧城身死汧獄几爾同圖心焉
摧剝扶老攜幼街號巷哭嗚呼哀哉明明天子旌以殊恩
光光寵贈乃牙其門司勲頒爵亦兆後昆死而有靈庶慰
冤魂嗚呼哀哉

潘安仁傷子辭

予之長安次於新安千秋亭而弱子夭感羸博之哀乃傷
之曰奈何兮弱子遯奔爾兮邱林還眺兮墳瘞草莽葬兮
木森森伊邈世之遐胄逮祖考之永延咨吾家之不嗣羌
一適而未甄仰崇堂之遺構若無津而涉川葉落永離覆

水不收赤子何辜罪我之由

潘安仁悲邢生辭

周文王之苗裔予元舅之洪胄厲慘確其不拔鄉譽著而
且就妙邦畿而高察雄州間以推秀茂實暢矣而休名未
衍其財至貧其位至賤而死之日奔者盈庭停予車而在
郊撫靈櫬以增悲瞻輜容而想像曾無覿乎餘輝送子兮
境垂永訣兮路岐一別兮長絕盡哀兮告離

潘安仁爲任子咸妻作孤女澤蘭哀辭

澤蘭者任子咸之女也涉三齡未沒衰而殞余聞而悲之
遂爲其母辭

茫茫造化爰啟英淑猗猗澤蘭應靈誕育鬢髮蛾眉巧笑
美目顏耀榮苞華茂時菊如金之精如蘭之馨淑質彌暢
聰慧日新朝夕顧復夙夜盡勤彼蒼者天哀此矜人胡寧

不惠忍予眇身俾爾嬰孺微命弗振拊覽衾裯仰訴穹旻
弱子在懷既生不遂存靡託躬沒無遺類耳存遺響目想
餘顏寢席伏枕摧心割肝相彼烏矣和鳴嚶嚶矧伊蘭子
音影冥冥彷徨邱隴徙倚墳塋

潘安仁金鹿哀辭

嗟我金鹿天姿特挺鬢髮凝膚蛾眉螭領柔情和泰朗心
聰警嗚呼上天胡忍我門良嬪短世今子天昏旣披我幹
又剪我根塊如癰木枯荻獨存捐子中野遵我歸路將反
如疑回首長顧

潘安仁哀永逝文

啟夕兮宵興悲絕緒兮莫承俄龍輻兮門側嗟俟時兮將
升嫂姪兮悼惶慈姑兮垂矜聞鳴雞兮戒朝咸驚號兮撫
膺逝日長兮生年淺憂患衆兮歡樂尠彼遙思兮離居嘆

河廣兮宋遠兮奈何兮一舉邈終天兮不反盡余哀兮祖
之晨揚明燎兮援靈輜撤房帷兮席庭筵舉醑觴兮告永
遷悽切兮增歎俯仰兮揮淚想孤魂兮眷舊宇視倏忽兮
若髣髴徒髣髴兮在慮靡耳目兮一遇停駕兮淹留徘徊
兮故處周求兮何獲引身兮當去去華輦兮初邁馬廻首
兮旋施風泠泠兮入帷雲霏霏兮承蓋烏倪翼兮忘林魚
仰沫兮失瀨悵悵兮遲遲遵吉路兮凶歸思其人兮已滅
覽餘跡兮未夷昔同塗兮今異世憶舊歡兮增新悲謂原
隰兮無畔謂川流兮無岸望山兮寥廓臨水兮浩汗視天
日兮蒼茫面邑里兮蕭散匪外物兮或改固歡哀兮情換
嗟潛隧兮旣敞將送形兮長往委蘭房兮繁華襲窮泉兮
朽壤中慕叫兮擗標之子降兮宅兆撫靈輟兮訣幽房棺
冥冥兮窺窺窺戶闔兮燈滅夜何時兮復曉歸反哭兮殯

宮聲有止兮哀無終是乎非乎何皇趣一遇兮目中旣遇
目兮無兆曾寤寐兮弗夢旣顧瞻兮家道長寄心兮爾躬
重曰已矣此蓋新哀之情然耳渠懷之其幾何庶無愧兮
莊子

陶淵明自祭文

歲惟丁卯律中無射天寒夜長風氣蕭索鴻雁于征草木
黃落陶子將辭逆旅之館永歸於本宅故人懷其相悲同
祖行於今夕羞以嘉蔬薦以清酌候顏已冥聆音愈漠嗚
呼哀哉茫茫大塊悠悠高旻是生萬物余得爲人自余爲
人逢運之貧簞瓢屢罄絺綌冬陳含歡谷汲行歌負薪鬻
鷄柴門事我宵晨春秋代謝有務中園載耘載耔廼育廼
繁欣以素牘和以七絃冬曝其日夏濯其泉勤靡餘勞心
有常閒樂天委分以至百年惟此百年夫人愛之懼彼無

成惻日惜時存爲世珍沒亦見思嗟我獨邁曾是異茲寵
非已榮涅豈吾縮粹兀窮廬酣飲賦詩識運知命疇能罔
眷余今斯化可以無恨壽涉百齡身慕肥遁從老得終奚
所復戀寒暑逾邁亡旣異存外姻晨來良友宵犇葬之中
野以安其魂窅窅我行蕭蕭墓門奢恥宋臣儉笑王孫廓
兮已滅慨焉已遐不封不樹日月遂過匪貴前譽孰重後
歌人生實難死如之何嗚呼哀哉

陶淵明祭從弟敬遠文

歲在辛亥月惟仲秋旬有九日從弟敬遠卜辰云空永寧
后土感平生之遊處悲一往之不返情惻惻以摧心淚愍
愍而盈眼乃以園果時醪祖其將行嗚呼哀哉於鑠吾弟
有操有鑠孝發幼齡友自天愛少思寡欲靡執靡介後已
先人臨財思惠心遺得失情不依世其色能溫其言則厲

樂勝朋高好是文藝遙遙帝鄉爰感奇心絕粒委務考槃
山陰淙淙懸溜曖曖荒林晨採上藥夕閑素琴曰仁者壽
竊獨信之如何斯言徒能見欺年甫過立奄與世辭長歸
蒿里邈無還期惟我與爾匪但親友父則同生母則從母
相及韶齒並罹偏咎斯情實深斯愛實厚念疇昔日同房
之歡冬無緇褐夏渴瓢簞相將以道相關以顏豈不多乏
忽忘饑寒余嘗學仕纏綿人事流浪無成懼負素志歛策
歸來爾知我意嘗願携手寘彼衆議每憶有秋我將其刈
與汝偕行舫舟同濟三宿水濱樂飲川界靜月澄高溫風
始逝撫杯而言物久人脆奈何吾弟先我離世事不可尋
思亦何極日徂月流寒暑代息死生異方存亡有域候晨
永歸指塗載陟呱呱遺稚未能正言哀哀發人禮儀孔閑
庭樹如故齋宇廓然孰云敬遠何時復還余惟人斯昧茲

近情著龜有吉制我祖行望旒翩翩執筆涕盈神其有知
昭余中誠嗚呼哀哉

顏延年陽給事誄

惟永初三年十一月十一日宋故寧遠司馬濮陽太守彭
城陽君卒嗚呼哀哉瓚少稟志節資性忠果奉上以誠率
下有方朝嘉其能故授以邊事永初之末佐守滑臺值國
禍荐臻王略中否獯虜間鸞劇剝司兗幽并騎弩屯逼鞏
洛列營緣戍相望屠潰瓚奮其猛銳志不違難立乎將卒
之間以緝華裔之衆罷困相保堅守四旬上下力屈受陷
勃寇士師奔擾棄軍爭免而瓚誓命沈城佻身飛鏃兵盡
器竭斃於旗下非夫貞壯之氣勇烈之志豈能臨敵引義
以死徇節者哉景平之元朝廷聞而傷之有詔曰故寧遠
司馬濮陽太守陽瓚滑臺之逼厲城固守投命徇節在危

無撓古之烈士無以加之可贈給事中振恤遺孤以慰存
亡追寵旣彰人知慕節河汴之間有義風矣逮元嘉廓祚
聖神紀物光昭茂緒旌錄舊勲苟有概於貞孝者實事感
於仁明末臣蒙固側聞至訓敢詢諸前典而爲之誄其辭
曰

貞不常祐義有必甄處父勤君怨在登賢苦夷致果題子
行間忠壯之烈宜自爾先舊勲雖廢邑氏遂傳惟邑及氏
自溫徂陽狐續旣降晉族弗昌之子之生立績宋皇拳猛
沈毅溫敏肅良如彼竹柏負雪懷霜如彼駢駟配服驂衡
邊兵喪律王略未恢函陝理阻漚洛蒿萊朔馬東驚胡風
南埃路無歸轡野有委骸帝圖斯艱簡兵授才實命陽子
佐師危臺憬彼危臺在滑之圻周衛是交鄭翟是爭昔惟
華國今實邊亭憑巘結關負河縈城金柝夜擊和門晝扃

料敵厭難時維陽生涼冬氣勁塞外草衰過矣獯虜乘障
犯威鳴驥橫厲霜鏑高翬軼我河縣倖我洛畿攢鋒成林
投鞍爲圍翳翳窮壘嗷嗷羣悲師老變形地孤援濶卒無
半菽馬實拊秣守未焚衝攻已濡褐烈烈陽子在困彌達
勉慰瘼傷拊巡飢渴力雖可窮氣不可奪義立邊疆身終
鋒枯嗚呼哀哉賁父隕節魯人是志汧督効貞晉策攸紀
皇上嘉悼思存寵異于以贈之言登給事疏爵紀庸恤孤
表嗣嗟爾義士沒有餘喜嗚呼哀哉

顏延年陶徵士誄

夫璿玉致美不爲池隍之寶桂椒信芳而非園林之實豈
期深而好遠哉蓋云殊性而已故無足而至者物之藉也
隨踵而立者人之薄也若乃巢高之抗行夷皓之峻節故
已父老堯禹錙銖周漢而綿世浸遠光靈不屬至使菁華

隱沒芳流歆絕不其惜乎雖今之作者人自爲量而首路
同塵輟塗殊軌者多矣豈所以昭末景汎餘波有晉徵士
尋陽陶淵明南岳之幽居者也弱不好弄長實素心學非
稱師文取指達在衆不失其寡處言愈見其默少而貧病
居無僕妾井曰弗任藜菽不給母老子幼就養勤匱遠惟
田生致親之議追悟毛子捧檄之懷初辭州府三命後爲
彭澤合道不偶物棄官從好遂乃解體世紛結志區外定
迹深棲於是乎遠灌畦鬻蔬爲供魚菽之祭織絢緯蕭以
充糧粒之費心好異書性樂酒德簡棄煩促就成省曠殆
所謂國爵屏貴家人忘貧者與有詔徵爲著作郎稱疾不
到春秋若干元嘉四年月日卒于尋陽縣之某里近識悲
悼遠士傷情冥默福應嗚呼淑貞夫實以誅華名由謚高
苟允德義貴賤何算焉若其寬樂令終之美好廉克已之

操有合諡典無愆前志故詢諸友好宜諡曰靖節徵士其
辭曰

物尚孤生人固介立豈伊時邁曷云世及嗟乎若士望古
遙集韜此洪族蔑彼名級睦親之行至自非敦然諾之信
重於布言廉深簡潔貞夷粹溫和而能峻博而不繁依世
尙同詭時則異有一於此兩非默置豈若夫子因心違事
畏榮好古薄身厚志世霸虛禮州壤推風孝惟義養道必
懷邦人之秉彝不隘不恭爵同下士祿等上農度量難鈞
進退可限長卿棄官稚賓自免子之悟之何悟之辯賦詩
歸來高蹈獨善亦旣超曠無適非心汲流舊歎葺宇家林
晨烟暮藹春煦秋陰陳書綴卷置酒絃琴居備勤儉躬兼
貧病人否其憂子然其命隱約就閑遷延辭聘非直也明
是惟道性糾纏韓流冥漠報施孰云與仁實疑明智謂天

蓋高胡謦斯義履信曷憑思順何寘年在中身疾維疔疾
視死如歸臨凶若吉藥劑弗嘗禱祀非恤係幽告終懷和
長畢嗚呼哀哉敬述靖節式尊遺占存不願豐沒無求瞻
省計却賻輕哀薄歛遭壤以穿旋葬而窆嗚呼哀哉深心
追往遠情逐化自爾介居及我多暇伊好之洽接閭鄰舍
宵盤晝憇舟車非駕念昔宴私舉觴相誨獨正者危至方
則閤哲人卷舒布在前載取鑒不遠吾規子佩爾實愀然
中言而發違衆速尤迕風先墜身才非實榮聲有歇歎音
永矣誰箴余闕嗚呼哀哉仁焉而終智焉而斃黔婁旣沒
展禽亦逝其在先生同塵往世旌此靖節加彼康惠嗚呼
哀哉

王僧達祭顏光祿文

惟宋孝建三年九月癸丑朔十九日辛未王君以山羞野

酌敬祭顏君之靈嗚呼哀哉夫德以道樹禮以仁清惟君
之懿早歲飛聲義窮幾象文蔽班揚性悖剛潔志度淵英
登朝光國實宋之華才通漢魏譽浹龜沙服爵帝典棲志
雲阿清交素友比景共波氣高叔夜嚴方仲舉逸翮獨翔
孤風絕侶流連酒德嘯歌琴緒遊顧移年契濶宴處春風
首時爰談爰賦秋露未凝歸神太素明發晨駕瞻廬望路
心淒目泣情條雲互涼陰掩軒娥月寢耀微燈動光几牘
誰照衾衽長塵絲竹罷調擘悲蘭宇屑涕松嶠古來共盡
牛山有淚非獨昊天殲我明懿以此忍哀敬陳奠饋

劉令嫺祭夫徐悱文

維梁大同五年新婦謹薦少牢於徐府君之靈曰惟君德
爰禮智才兼文雅學比山成辨同河瀉明經擢秀光朝振
野調逸許中聲高洛下含潘度陸超終邁賈二儀旣肇判

合始分簡賢依德乃隸夫君外治徒奉內佐無聞幸移蓬
性頗習蘭薰式傳琴瑟相酬典墳輔仁難驗神情易促電
碎春紅霜雕夏綠躬奉正衾親觀啟足一見無期百身何
贖嗚呼哀哉生死雖殊情親猶一敢遵先好手調薑橘素
組空乾奠觴徒溢昔奉齊眉異於今日從軍暫別且思樓
中薄遊未反尙比飛蓬如當此訣永痛無窮百年何幾泉
穴方同

謝惠連祭古冢文

東府掘城北塹八丈餘得古冢上無封域不用塹甃以木
爲椁中有二棺正方兩頭無和明器之屬材瓦桐漆有數
十種多異形不可盡識刻木爲人長三尺可有二十餘頭
初開見悉是人形以物振撥之應手灰滅棺上有五銖錢
百餘枚水中有甘蔗節及梅李核瓜瓣皆浮出不甚爛壞

銘誌不存世代不可得而知也公命城者改埋於東岡祭之以豚酒旣不知其名字遠近故假爲之號曰漠漠君云爾

元嘉七年九月十四日司徒御屬領直兵令史統作城錄事臨漳令亭侯朱林具豚醪之祭敬薦漠漠君之靈參總徒旅版築是司窮泉爲壑聚壤成基一椁旣啟雙棺在茲捨奢悽愴縱鍾漣而芻靈已毀塗車旣摧几筵糜腐俎豆傾低盤或梅李盎或醢醢蔗傳餘節瓜表遺犀追惟夫子生自何代曜質幾年潛靈幾載爲壽爲夭寧顯寧晦銘誌塋滅姓字不傳今誰子後曩誰子先功名美惡如何蔑然百堵皆作十仞斯齊壙不可轉漣不可迴黃腸旣毀便房已頽循題興念撫脩增哀射聲垂仁廣漢流渥祠骸府阿掩骼城曲仰羨古風爲君改卜輪移北隍窀穸東麓壙卽

新營棺仍舊木合葬非古周公所存敬遵昔義還耐雙魂
酒以兩壺牲以特豚幽靈髣髴歆我犧樽嗚呼哀哉

庾子山思舊銘

此亦哀誄之文非施于碑誌者故附諸此

歲在攝提星居鶉首梁故觀寧侯蕭永卒嗚呼哀哉人之
戚也旣非金石所移士之悲也寧有春秋之異高臺已傾
纓下有聞琴之泣壯士一去燕南有擊筑之悲項羽之晨
起帳中李陵之徘徊岐路韓王孫之質趙楚公子之留秦
無假窮秋于時悲矣况復魚飛武庫預有棄甲之徵鳥伏
翟泉先見橫流之肇星紀吳亡庚辰楚滅紀侯大去鄆子
無歸原隰載馳輾轅長別甲裳失矣餘皇棄焉河傾酸棗
杞梓與檣櫓俱流海淺蓬萊魚鼈與蛟龍共盡焚香復道
詎假遊魂載酒屬車寧消愁氣芝蘭蕭艾之秋形殊而共

瘁羽毛鱗介之怨聲異而俱哀所謂天乎乃日蒼蒼之氣
所謂地乎其實搏搏之土怨之徒也何能感焉彫殘殺嗣
無所假於颺風零落春枯不足煩於霜露幕府昔開賢俊
翹首爲羈終歲門人謝焉至於東首告辭西陵長往山陽
車馬望別郊門潁川賓客遙悲松路稽叔夜之山庭尙多
楊柳王子猷之舊徑唯餘竹林王孫葬地方爲長樂之宮
烈士埋魂卽是將軍之墓昔嘗歡宴風月留連追憶平生
宛然心目及乎垂翅秦川關河羈旅降乎悲谷之景實有
憂生之情美酒酌焉猶憶建鄴之水鳴琴在操終思華亭
之鶴重爲此別嗚呼甚哉麟亡星落月死珠傷瓶罄壘恥
之焚蕙歎所望鐘沉德水聲出風雲劍沒豐城氣存牛斗
潛然思舊乃作銘云

風雲上慘舟壑潛移駸駸霜露君子先危紀侯大去懷王

不返玉樹長埋風流遂遠荀伯舊縣慶封餘邑萬里歸魂
修門詎入墳橫武庫山枕盧龍思歸道遠返葬無從徒留
送雁空靡長松平陵之東無復梧桐松聲蕭瑟長起秋風
疇昔隆貴提攜語默託情稽阮風雲相得有酒如澠終溫
且克朝陽落鳳大野傷麟佳城鬱鬱流寓於秦山陽相送
唯餘故人婦機髮緯獨鳳孤鸞閨深夜靜風高月寒生平
已矣懷舊何期匣中絃絕鄰人笛悲昔爲幕府今成總帷